

Kingusinnerpaamik UPA 2013-imut Qasigiannguani Efterskole Villads Villadsenimi atuartut 20-nik amerlatigisunik ilasinnaanerannik Naalakkersuisut misissuinissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kristian Jeremiassen, Siumut)

Akissuteqaat

(Ilinniartitaanermut, Ilisimatusarnermut Nunanullu Avannarlernut suleqatigiinnermut Naalakkersuisoq)

Siullermeerinnineq

Inatsisartunut ilaasortaq Kristian Jeremiassen, Siumut aalajangersimalluinnartumik siunnersuuteqarpoq Qasigiannguani Efterskoli Villads Villadsenimi ilinniartut ilinniartunik 20-nik ilaneqarsinaanerannik misissuinissamik Naalakkersuisut peqquneqassasut.

Naalakkersuisut maannangaaq ilisimatitsissutigisinnaavaat Efterskoli Villads Villadsenimi ilinniartut ukiumut 100-nngortinneqarnissaat nunap karsianut katillugit 13.230.000 kr.-inik akeqassasoq, tassa ingerlatsinermit tapiissutinut ukiumut maannakkut aningaasaliissutigineqartartut 2.646.000 kr.-inik qaffariassapput.

Atuartut atuartunik 20-nik amerlineqarnissaannik Efterskoli Villads Villadsen, imminut pigisuusoq, kissaateqarpat, init illutallu, tassunga ilanngullugit igaffik, nerisarfik, atuartut inaat il.il. atuartut amerlissutaat inissaqartinniarlugit aamma allilerneqartariaqarput, aammalu efteskolimi atuartut tamarmik ilaqutariinnik pulaarfigisartagarisinnaasaannik pissarsinissamut illoqarfik naammattumik angissuseqarnerisooq nalilerneqartussaalluni.

Naalakkersuisut ilisimaneqartut Maniitsumi efterskolimi inissat maannakkut amerlilerpaat. Naalakkersuisut inassuteqaatigissavaat efterskolimi inissat amerlinissaannik taassumalu inissisimaneranik misissuinnginnermi Maniitsumi inissat amerlilernerisa sunniutigisinnaasai utaqqimaarneqassasut.

Taamatut naatsumik oqaaseqarlutik, siunnersuutip itigartinneqarnissaa Naalakkersuisut innersuussutigaa.